


DEN AMBIENTE



GLORIA ESTEFAN TA PURA PA YEGA E PERLA DI CARIBE

Mayan anochi pa exactamente 11or e super estrella Cubana, Gloria Estefan hunto cu su Miami Sound Machine lo yega Aruba for di Maracaibo Venezuela.

Esaki sigur lo bay ta un alivio grandi pa Gloria, ora e pisa riba suelo di Aruba, cu ta c'roc'i pa nos hospitalidad y e bon servicio cu nos ta custumbra pa brinda nos bishitantenan. Tambe Gloria ta na altura di nos bunita playanan cu su santo blanco cu ta ser considera e mehor di Mundo. Gloria lo ta acompaña pa casi 150 miembro di su organisacion, y nan lo hospeda den e luhoso La Cabana Raquet Beach Club.

Na su yegada na Aruba, di parti di gobierno hefe di protocol Atan Lee tin un programa prepara cu presencia di nos Ministranan y nos Miss Aruba Jerusha Rasmijn pa duna Gloria un caluroso bon bini, mientras di parti di ROYAL CABANA CASINO nos flamante reina infantil Melony Paesh lo ricibi Gloria Estefan cu un bunita bouquet de flor traha pa Oncha's Flower Shop cu matanan especial di Aruba.

Su stage gigante traha especial pa su conciertonan pa giranan lo yega awe tardi cu dos Mc Donnel Douglas DC-10, y lo ser transporta inmediatamente pa Mansur Ballpark caminda e espectáculo lo bay tuma lugar dia 10 y 11 di otro siman. Pa arma e stage aki tin 75 persona profesional envolvi cu sabi exactamente con pa arma e gigantesco stage aki. E stage aki ta di tal forma desarma na number cu te asta den e avion e ta numera, cu si e no bay na ordu e no ta fit den e avion.

E avion nan aki ta carga solamente e partinan di e stage y ta solamente e piloto nan so lo ta den e avion.

Ultimo informacion cu DEN AMBIENTE ta dispone ta cu na Colombia Bogota Gloria Estefan a ser ricibi na aeropuerto El Dorado pa mas di cinco mil di su siguidornan. Nan tabata na aeropuerto for di seis or di atardi caminda e avion di American Airlines mes a yega exactamente 8:40 pm. Na su yegada e multitud di fotografonan, Radio y television a invadi e plataforma den tal forma cu polis nan y su bodyguard priva mester a hibe den sala di inmigracion na asina e descans pa casi 20 minuut debi na su cansancio cu e vuelo largo for di Miami.

Pafor di aeropuerto su siguidornan curioso tabata canta y grita "BIBA GLORIA" y tabata trata tur manera pa haña autografia y tuma foto di nan idolo. E superconcierto mes den e stadion El Campin tabata un locura total, caminda tabata reina alegria y un espectáculo musical. Gloria a sorprende tur hende den stadion ora e la interpreta e cancion cu e la Colombianisima "YO ME LLAMO CUMBIA". Cu e bunita gesto aki Gloria a conquista e curasonan di tur e Colombianonan den e stadion di casi 75 mil alma. Gloria a demostra pa kico e ta e artista mas exitoso den e mercado Mundial actualmente.

Gloria ta carga e ritmo for di su sanger, y ta biba cu e musica perfectamente hunto cu su publico. E sa ki ora e publico ta cansa, oranan kier rumba y tambe balada. Su contacto cu e publico ta permitie gana simpatia mesora. E grupo cu ta compañía Gloria esta Miami Sound Machine ta sobresali pa nan calidad musical. Den e sector di percusión ta ser domina en totalidad pa musiconan emigra for di Cuba cu ta conoci



mundialmente pa ta maestro nan riba e tereno aki. Durante e concierto Gloria mes ta saca e dos sticksnan di timbal for di su manga, y ta cuminza faya su mes tremendamente riba un solo y bao di avalancha di aplausonan di e enorme multitud cu ta bira loco na e momentonan aki.

E espectáculo mes ta cuminza ora un grupo di ballet subi riba podium cu nan caranan tapa, y direpiante un di nan ta kita e mascarada y ta aparece e estrella di anochi: Gloria Estefan. E sonido ta asina zuiver cu ta mescos ta ariba un compact disc bo ta scuchando. Tambe lo bay tin un pantalla di video cu un camara semper lo focus riba

Gloria combina cu efectonan di luz cu ta bay haci e dos anochinan aki algo inolvidabel. Gloria lo bay interpreta tur su exitonan grandi tanto den ingles y spaño, pero lo pone enfasis riba e cancionnan mas popular manera "OYE MI CANTO" y CONGA. Entre e baladanan mas destaca "DON'T WANNA LOSE YOU" y COMING OUT OF THE DARK lo e bay pone Mansur Ballpark vibra.

For di Curacao ta ser spera un multitud di siguidornan di Gloria y tambe for di Miami y Estados Unidos ta ser spera un gran cantidad di siguidornan pa e espectáculo aki. Aruba lo bay marca historia

cu bishita di Gloria Estefan y su Miami Sound Machine cu actualmente ta den e topranking di Mundo. Proximo si-

man lo bay tin hopi movecion na Aruba y especialmente nos aeropuerto lo ta constantemente druk. Pa esunnan cu

no a cumpra nan carchi ainda mayan pa 12 di merdia nan por cuminza cumpra nan carchi na Mansur ball Park. Tambe den siman por cumpra na Mansur Duty free shop den freezone, y na Royal Cabana Casino tur dia y anochi. No laga nan conta con bon nan a pasa, waak pa bo mes presencia e espectáculo aki. Ta un biaha ta BIBA !!!